



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

Tir Yimyim

tiryimyim@aolima

tir yimyim

TAPAK 8

NIT Meghalaya-i SCC tenteter  
Nongkynrih nem doctorate agütsütsü

Rara tembangtsü North Korea-i  
molunga lir: Kim Yo-jong



VOL. XVIII NO. 343 (ADOK 343) DIMAPUR

KÜPTOKNÜ (SATURDAY)

RONGJUI (SEPTEMBER) 25, 2021 ₹ 5.00

## TR Zeliang-i A.K Mishra nem tenüngsang agütsü

**Kohima, September 24, 2021 (TYO):** Naga yimjung olemtepnung Interlocutor inyaktüsü shimba atema taoba Nagaland Chief Minister aser Naga People's Front (NPF) leader, TR Zeliang-i A.K. Mishra nem tenüngsang agütsüo.

Bod barnü Tamil Nadu Governor, R.N Ravi-i interlocutor mapa nungi sodi agia liasü.

Hokol barnü TR Zeliang-i Nagaland House, New Delhi nung AK Mishra den ajurutepba osang metetdaksü.

"Yimjung olemtepnung jenjang tajungba akümtsü aser alizüng atongtsü ta ni tamang akar. Olemteperitem tsüngda tekong merangtepba ajanga tetsükdaksü ajuru saka tang nungi inyakyim tajungba akümtsü aser tekaratiba nung ozü lima yimjung bener arutsüsa telemtepba ka agitsü

imlar" ta TR Zeliang-i Mishra dang ashi.

Prime Minister Narendra Modi aser Union Home Minister Amit Shah nati Naga yimten tebilemtsü angatetteptsü atema nendaka inyakba atema pelar, ta paisa metetdaksü.

"India sorkari Interlocutor ka dang ayutsü lemtetba ajanga nübortemi ola adokba angashiba kuli sayur. Iba ajanga yimten latettsü atema mapa inyaka otettsü" ta TR Zeliang-isa ashi.

"Iba ama tongtipang mapang ka nung kin hohotem, Civil society teloktem, kaketshirtem tentet balala aser arogotem longiemer yariteptsüla. Nenoki NLA tem pusema nungitsüla aser India sorkar dang Tenangzükba Ka aser Telemtepba Ka dang asütsüla ta ola adoktsüla" ta paisa ayongzük.

## Dimapur New market nung 'digital rate chart' ayur

**Dimapur, September 24, 2021 (TYO):** Dimapur Municipal Council-i Hokol barnü New Market nung 'digital rate chart board' ka enokogo aser iba ya Nagaland nung tang mezüng asütsü.

Tanü Dimapur Additional Deputy Commissioner, Atokhe Aye-i 'digital rate chart board' sayatsü.

"Iba digital rate chart nung anogoshia tang nungdabatem indang jenjang sayutsü" ta DMC Administrator, Albert Ezung-i ashi.

DMC-isa Murgipatti aser Old daily market nunga iba mesükba digital boards ayutsü sentong lir, ta pai metetdaksü.

"Public-i anogoshia digital boards nung jenjang repranger shishitsü ayongzük. Maneni,

timtem kar adokra board nung agüja aliba helpline number nung tongtepratepang" ta Albert Ezung-isa metetdaksü.

Dimapur ADC, Atokhe-ia o tatsüka jembidang Dimapur Municipal Council-i jenjang latettsüba ama shishilembartemi yokyayokji asütsü ayongzük.

"Public-i mapang shia shishilembadak jenjang balala agi ayokba atema ken o tem benoker saka aiben parnoki dokanji tuteta mashir. Anungji DMC-i tenteta aliba grievance cell den public-i osang tejangja metetdaksütsüla" ta Atokhe-isa ashi.

Paisa DMC Administrator Albert Ezung-i anir DMC ajanga Dimapur nung terenlok tasen bener aruba atema tenüngsang agütsü.

## Mkg police-i asür Easter Phom tepseter apu



**Dimapur, September 24, 2021 (TYO):** Mokokchung nung Mrs. Easter Phom tepsetba dak sendakba nung Mokokchung Police-i nisung ka puogo.

Asür Mrs. Easter Phom tepsetba atema Mokokchung Women Police Station nung ken o ka benok aser iba atema Special Investigation Team (SIT) ka tenteter bushisüngdanga aru, ta

PRO DEF Mokokchung-i Hokol barnü sangdong ka nung ashi.

SIT-i bushisüngdanga arudang arishi küm 44 tain Aowati apu. Pa ya Molungkimong nung asür Pangjungmanen'er jabaso lir aser tang Yimyu Ward, Mokokchung nung telidak lir, ta sangdong nungsa ashi.

September 13, 2021 anepdang pai asür Mrs. Easter Phom tepset ta Aowati-i police dang nangzükogo.

Chuba Chang. NPS. SDPO Mokokchung-i anir SIT züngsemtemi nisung tepseter apuba atema SP Mokokchung Aotula T. Imchen, IPS-i tenüngsang agütsüo, ta PRO DEF Mokokchung-isa ashi.

## NPCC-i sorkar anema crusade tenzükogo NAGALAND MLA 47-I BJP MLA 12 TSÜBUR

**Dimapur, September 24, 2021 (TYO):** Nagaland Pradesh Congress Committee (NPCC)-i Hokol barnü Congress Bhavan Dimapur nung state sorkar anema crusade tenzükogo.

"Tanü nisung tali temeyoktepnung akümba, tamangba yimsü tesayubatem menendokba aser sobaliba inyakyim sama odaktsüba ajanga asen Naga loktiliba lendong nung lir.

"BJP/RSS teloktemi Hindutva tangatetba nung mapa inyakba aser nisung tsüngda telemsa adokdaksür inyaksangshiba ajanga Khristan tangatetbatem sama odaktsür aser ibaji tawa Raksha Bandhan nung atalokba ajanga sayur" ta tanü NPCC President K. Therie-i o jembidang ashi.

BJP MLA 12-i BJP/RSS ajanga tuyuba mapatem inyaker aser MLA 47-i parnok tsübur. Iba jagi Naga nung maitsü, sobaliba aser inyakyim sama aoer, ta pai ashi.

"Nagaland Assembly-i yimten latettsü atema lenmang lapoktsü saka olemtepnung tembangaka

parnoki nangzükba ama meinyaker. Külen, nübortembo tashiyim agi sen saruba, ochimashi inyakyim, terenlok maliba, mapa manguba aser backdoor appointments khuretem ajanga kangshir" ta K Therie-isa ashi.

"Nagaland nung tang aliba sorkari nungi nübortemi teimla kecha mali kechiyong parnoki nübortem dang parnok indang Manifesto den-a mesayu. Tarutsü ajungtsü atema nübortem dang oa votes meshitsü nungdak adok aser iba jagi onoki iba crusade ayonga agir" ta paisa ashi.

Nagaland State budget samar aser tang crore 23,000 kümogo. Nagaland nung ochimashi, tashiyim agi sen meshiba aser süpokrem inyakyimtem yimya ka ama dang kümogo, ta NPCC president-isa metetdaksü.

Northeast nung Guwahati sülenbo Dimapur lir saka sorkari renlok daksütsü mesüra entrepreneurs ajungkettsü atema alizüng kecha mali. Industrial policies shitak maliba den senotsü magütsüba ajanga

rongsenkettsüng jenjang ajungkettsü lenmang sadema liaka meinyaker, ta paisa ashi.

"Congress nem sorkar akümtsü maongka agütsüra onoki industry renloktsü atema senotsü agütsütsü aser tetsürtem nem shilem tulu agidaksütsü. Congress-i health insurance mapa inyaktüsü aser state ajungalen renlok daksütsü. Civil society temia pei pei noktakba onüktem nungi masetshitsüla aser vote enoktsürtemi nübortem atema inyakba sorkar ka akümtsü atema shilem agitsü ayongzük" ta K Therie-isa ashi.

Iba sentong nung VP, NPCC V. Lasuh, VP, NPMCC Mrs. Neojila, Chairman, Minority Dept, NPCC Rajesh Kumar Sethi, President, 5th ACCC Ghaspani-II Lashito Shohe aser President, NYC R. Mukhe Yimkhiung nungertemia o jemi.

Sentong nung President 4th ACCC Ghaspani-I Kuhoto I. Awomi-i temoatsü meshia sarasadem aser President, NSUI, Nagaland X. Chophika Sumi-i tembanga sarasadem.

## Union Minister Reddy-i Nagaland nung mezüngbuba 'Soil Testing Lab' lapoktsüo

**Kohima, September 24, 2021 (TYO):** Hokol barnü Union Minister for Tourism, Culture and DoNER, G Kishan Reddy-i Nagaland nung mezüngbuba Soil Testing Laboratory lapoktsüo.

Directorate of Soil and Water Conservation nung lapokba Soil Testing Laboratory ya 2018-21 tsüngda Rs 3.71 crore endoka yanglu. North Eastern Council (NEC)-i Ministry for Development of North Eastern Region (DoNER) kübok senotsü teyari agüja iba Laboratory yanglua liasü.

Union Minister Reddy-i anogo ananü atema Nagaland semdangi arua lir aser tanü pai ashiba agi "Prime Minister Narendra Modi-i northeast nung temolung kanga agütsür."

Prime Minister-i North East dang 'ashatalakshmi' state tem ta ajar, ta paisa ashi.

## COVID-19 Nagaland: Nisung 31,085 dak putet; 661 süogo

**Kohima, September 24, 2021 (TYO):** Nagaland nung Hokol barnü nisung COVID-19 dak COVID-19 aliba putet aser parnok züngsema nisung 31,085 kümogo.

"Tanü nisung 58 dak COVID-19 putet. Parnokji Dimapur nung 46, Kohima nung 8, Kiphire nung 2 aser Mokokchung o Phek nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Tesüiba ghonda 24 tsüngda COVID-19 puteta alir nisung 45 taneptsü angu. Parnokji Dimapur nung 18, Kohima nung 16, Phek

dang 'ashatalakshmi' state tem ta ajar, ta paisa ashi.

"Ashtalashkmi states nung sobaliba, nisung aser oshio ben temeyoktepnung lir anungji Northeast state temi green tourism, eco-tourism, rural tourism, film tourism aser tea garden tourism amala mapa inyaktüsüla" ta Reddy-i tebilemba ka lemsatep.

India sorkari tsünusenbongbarem ajungkettsü aser ali rongsen wazüka ayutsü atema ali jenjang shitak ayutsü atema mapa inyaker, ta paisa ashi.

"India sorkari taküm North Eastern State tem nung aluyimertem indang scheme balala atema Rs 6000 crore lemezüktsüo anungji aluyimertemi item teyari agitsü ayongzük" ta Union Minister-isa metetdaksü.

National Mission for Sustainable Agriculture (NSMA) kübok Soil Health Management (SHM) ya mapa tongtipang rongnung ka lir, ta paisa shisem.

Tanü Union Minister Reddy-i Soil Testing Laboratory reprangdangba sülen osettsüset tajung yua aliba ngua pelaba metetdaksü.

"Iba ya Laboratory tajung ka lir aser Nagaland nung aluyimertem ajangzüktsü" ta pai ashi.

"Iba mapatong ya Rs 371.70 lakh endoka inyak. NEC nungi 90% Rs 334.53 lakh aser state sorkar nungi 10% Rs 37.17 lakh liasü" ta Soil and Water Conservation Director, K Zhekheto Awomi-i NEC project indang osang metetdaksü dang ashi.

nung 7 aser Mokokchung o Zunhebotto nung anana (2) lir" ta paisa ashi.

Nisung 31,085 nungi 28,980 taneptsü nguogo aser ibaji 93.22% lir, ta Dr Kikon-isa ashi.

Tang Nagaland nung COVID-19 puteta anepalur nisung 474 lir saka parnok 368 dakbo shirangba yimya kecha mali, ta paisa shisem.

Tanü Dimapur nung COVID-19 puteta alir ka asüba züngsema tasür ajak agi nisung 661 kümogo saka parnok 15 dakbo tanga tashidak liasü, ta Dr Kikon-i metetdaksü.

"Brihostibar tashi nung nisung

681,874 nem COVID-19 vaccine indang dose 10,09,775 agütsüo" ta State Immunization Officer, Dr Ritu Thurr-i ashi.

"Vaccine agirtem rongnung frontline workers 60,919, healthcare workers 15,995, arishi küm 45 ser temapur 197,102 aser arishi küm 18 nungi 44 tsüngda alir 407,858 lir" ta paisa ashi.

"Vaccine agirtem rongnung nisung 327,901-i dose anaprong agiogo. Parnokji frontline workers 47,033, healthcare workers 13,234, arishi küm 45 ser temapur 131,914 aser arishi küm 18 nungi 44 tsüngda alir 131,914 lir" ta Dr Thurr-isa ashi.

## Libaliru jenjang ajungtsüsa digital amshitsüla: Advisor Imnatiba



NIELIT Auditorium, Kohima nung September 24, 2021 nü Advisor, Industries and Commerce, Labour and Employment, Skill Development and Entrepreneurship, Imnatiba ajanga digital Literacy Book ka sayatsüba mapang tangokba noksa ka yangi angur.

**Dimapur, Rongjui/Sept. 24 (TYO):** Northeast State tem nung aluyimer takum libaliru tajungba kumdaktsüsü asoshi handloom aser handicraft sector nung digital aidaktsüba sentong ka September 24, 2021 nü NIELIT Auditorium, Kohima nung Advisor, Industries and Commerce, Labour and Employment, Skill Development and Entrepreneurship, Imnatiba ajanga sayatsü.

Iba sentong sayatsüba mapang, tashidak wara agi alima tesem ajunga sünger lia digital ya kanga nüngdaka liasü, koba loktiliba nung shilem ka ama kumogo, ta Imnatiba-i ashi.

Takum libaliru atema handloom aser handicrafts sector nung digital adenba ajanga state nung aluyimer aika ajangzüksü. Government of Nagaland ajanga handloom aser handicraft yanglurtem nem temolung agütsür, kechiaser ibaji ajanga asen sobaliba temaba jenjangi ajungkettsü, ta Advisor Imnatiba-i ashi.

Department of Industries and Commerce aser NIELIT dang iba project takok ngua inyaksü ajungshiba mapang, parnoki amalitepba aser yaritepba ajanga artisan aser entrepreneurs nem pei sempet tali tajungba nung amshitsü maongka aika agütsüsü, ta pai ashi.

**Dimapur, Rongjui/Sept. 24 (TYO):** Tang tagidak "Smoke Free District Headquarters Campaign" nung shilem ka ama moko aziokba indang advocacy workshop ka September 24, 2021 nü Kohima Municipal Council (KMC) Office building nung agia liasü.

Iba workshop nung Administrator KMC, Lanusenla Longkumer menden liasü aser Smoke Free Kohima City campaign ya April 29, 2016 nung tenzüka "Smoke Free District Headquarters Campaign" atema sentong balala ayongzuka arur, ta lai ashi.

Kohima ya "Smoke Free District Headquarter" ka akumtsü atema nübur ajungai shilem agitsüla aser yariteptsüla, ta lai ashi.

Iba workshop nung District Nodal Officer, NTCP, Kohima, Dr. Arenla Walling-i jembiba

Iba maparen ya ajanga handloom aser handicraft sector nem jenjang ka bendenloksüsü, ta ashi aser iba project ajanga nübur libaliru tajungba kumdaktsüsü department ajungshia liasü.

NIELIT indnag Director, L.Lanuwabang-i iba project indang rateta jembiba mapang, jenjang aketba osettem tali adokdaktsüsü atema tapet technology tem yanglutsü nükjidong nung tenzüka iba project ya North East nungbo Nagaland ya mezüngbuba alitsü, kong 'quality up gradation,' 'quality control,' aser 'technological up gradation' alitsü, packaging aser delivery tashi itshitsü, aser ibaji ajanga market timba awajema aisü nung tajangzük alitsü, ta ashi.

Iba project nung artisan tem nem training teyari, linkages technology aser digital market development agütsüsü, ta pai ashi.

Nagaland nung handlooms mesüra handicrafts yanglur lanir 5920 nem iba sentong ajanga training agütsütetsü.

Iba project nungi ajangzükba ya alima dang Dynamic Web Portal ajanga ajungkettsüsü aser alima tesem ajunga nung item oset ayoktsü atema e-commerce facility agütsüsü, ta pai ashi.

NIELIT Kohima ya start up

incubator ka ama IT tsütsü Department of Industries and Commerce yaria arur, ta Commissioner and Secretary Industries & Commerce, Kekhrievor Kevichusa-i ashi.

Iba project ya ajanga department kisüng masü saka Nagaland nung aliba artists aser artisans tem sempet ajungkettsüsü, ta pai ashi.

North East nung Digital Intervention project ya Nagaland nung mezüngbuba amshir asünung, iba sentong ya training agirtem kisüng atema masü saka entrepreneurs tejangrartemia amshitetsü.

Iba sentong nung Advisor Imnatiba-i MIS portal semzüksü aser digital Literacy Book ka saya liasü.

Iba sentong ya NIELIT ajanga Department of Industries and Commerce den lungjemer ayongzuka liasü, kong tarur pela agizükba o ya Joint Director NIELIT, Daniel Meren ajanga jembiba aser Dy. Director NIELIT, A Morimenba Amer ajanga melepzüng o jembiba liasü.

Iba project ya National Institute of Electronics and Information Technology Kohima ajanga inyaksü aser Ministry of Electronics and Information Technology, Government of India ajanga sponsor asür.

## Smoke Free Kohima District Campaign' nung workshop agütsü

mapang, COTPA 2003 indang Section 4 mapa kuma inyakba nung tashi itshitsü atema smoke free campaign ya tenzük, ta ashi. COTPA 2003 indang Section 4 ajanga jangjateta aliba nüburtemi amshiba tesemtem nung moko achiba nokdang.

Medical department kisüngi iba ozüng ya mamshitetsü, anungji ozüng amshirtem aser nüburtemi yarisema Kohima district ya Smoke Free District ka kumdaktsüsüla, ta lai ashi.

Moko achiba ya nokdangtsüla, kechiaser yangji temang asoshi timtem agütsüba chemical 7000 dak tema lir, aser item rongnung 100 kanga majung aser 70 shi agi cancer adokdaktsür, ta Dr. Arenla-i ashi.

"Moko achiba aser 2nd hand smoke saokba ajanga cancer, CV tashidak, stroke, pneumonia amala adokdaktsür aser reproductive system raksatsür,

tetsür aser tanur dak TB menatsü maongka agütsür. 2nd hand smoke nungi tetsür aser tanur dak tali kongshir," ta lai ashi.

Moko achir aser COVID-19 indang jembiba mapang, 1st hand smoke mesüra 2nd hand smoke ajanga tepokpok nung kongshia tango sashiba nung timtem agütsür, ta Dr. Arenlai ashi.

COVID-19 ya menatapa aoba tashidak ka lir, koba agi tepokpok nung tali kongshir, moko achiba agi tepokpok mejungi kumdaktsür, anungji iba virus den raratsü tasakba akumer, ta lai ashi.

Achila Walling, Social worker NTCP Kohima ajanga COTPA 2003 kübok Acts aser Section balala indang PowerPoint agütsü aser NTCP, Kohima nungi Psychologist, Pelebeinu Khezhe ajanga melepzüng o jembiba liasü.

## Office of the MOLUNGKIMONG VILLAGE COUNCIL

Mejensanger Putu Menden  
Dist. Mokokchung, Nagaland. P.O. Tuli 798618

### SANGDONGER

13/09/2021 anogo nung Yimyu Ward, Mokokchung nung Mrs. Easter Phom tepseta aliba ken o nung Mr. Aowati pua aliba angashia pa indang jangjashitsür.

Mrs. Imodangla ya dangar memene matu liasü aser la ya 1975 nung yim doktsür Tuli Town nung lua ali. La Tuli nung lua alidang Mr. Aowati aso, saka lai tebu meshitet nung Mrs. Imodangla teyi aser kinungbu Late. Mr Pangjungmanen Ozukum, Molungkimong nati mesütet, Saka tanü tashi Mr. Aowati-i Molungkimong senso alia mali.

Anungji shingaia Mr. Aowati ya Molungkimong senso ta amshitsü memelar.

Iba tatalokba osang angashia Molungkimong Village Council-ia khukhua aitsür.

(I. Imsu Tzudir)  
Chairman  
Village Council Molungkimong

(T. Chuba Tzudir)  
Secretary  
Village Council Molungkimong

## Kohima Police ajanga rakzükraakter ka apu, ka bushir



**Dimapur, Rongjui/Sept. 24 (TYO):** SBI Main Branch, Kohima anasa doctor ka indang gari nungi mejangjaba nisungtemi mask agir prangbong bener arua sen lakh pongu ayua bener aoba osang ka September 20, 2021 nü North Police Station, Kohima dangi arua liasü, ta sangdong ka ajanga ashi.

Iba mapang gari telung nung driver mena liasü aser doctor ya

anasa aliba dokan ka nung nüngdak kar inyaka liasü.

Osang nung ajemdaker North Police Station nungi lenirtemi anir ayameso aser kuli bendenba nung ajemdaker iba ken o ya osang angashir ghonda 24 majungdang jangjateta liasü, ta sangdong ajanga ashi.

Iba mapa ya arishi küm 50 tain Lhoulietuo Kire aser arishi küm 51 tain Zehoulie Kets nati inyak, ta jangjatet. Iba sülen Lhoulietuo Kire ya September 21, 2021 aonung Gariphema Bawe village nung apu aser pa ket nungi sen 2,50,000 nguteta liasü.

Ken o nung tai tonglokja aliba nisung tanabuba, Zehoulie Kets ya tang tashi jenshia senzür aser police temi pa pua tanüngba ngutetsü meranga inyakteper. Iba dak sendakba nung maneni bushisüngdangtsü atema ken o ka North Police Station nung benoka lir, ta sangdong ajanga ashi.

## Athuan Abonmai pua bener oa tepsetba atema lokti balalai aitsür

**Dimapur, Rongjui/Sept. 24 (TYO):** Prangbong bona alirtemi Tamenglong area nungi taoba mapang Zeliangrong Baudi indang tir aser lenir Athuan Abonmai pua bener oa tepsetba osang angashia süngmanger aser aitsür, ta Naga Mothers' Association (NMA) sandong ka ajanga ashi.

Tensa kecha nunga nisung tepsetba temeden mali. Onoki prangbong bela aliba adianutem ajunga dang azüdokshiba nungi pila alitsü aser asenok rongnung yimjung yangertsü atema tebang agi jembishinütsü ajungshir, ta sangdong ajanga ashi.

Mapa tamajung inyaker nem tapet temerenshi agütsüsüla aser pa kinungtsü, tanur aser kinungertem den asükhu lemsateper. Asür tanüla tesunep nung anisüngzükjangma, ta NMA sangdong ajanga ashi.

Nagaland Tribes Council (NTC) ajanga sangdong ka nung, Zeliangrong Baudi (Assam, Manipur aser Nagaland) nung taoba tir, social worker aser lenir Athuan Abonmai, September 22, 2021 nü Tamenglong District Headquarters nung taochi mali tepsetba osang angashia aoksar, ta ashi.

Athuan Abonmai tepsetba yagi

state balala anakshitsüba kisüng masü saka Naga nung yimjung meimba molungsentüsü meinpronger, shirnoki region nung yimjung aginüa tesüba küm ishika tesunep nung lia arur, ta ashi.

Pei nübur pua bener oa tepsetba ajanga küm ishika tejakdang telok balala tsüngta raradang Naga nung senti takum jenti laluba bilemtedaktsür, koba tanaben ataloktsü memelatsü, ta NTC sangdong ajanga ashi.

Senti takum ya Tsüngrem kisüngi agütsütetsü aser pei kabu nung ozüng amer tebilemdangba makai nisung takum ka agiba ya meimchir aser Tsüngremi agütsüba ozüng alema lir.

Anungji Nagaland Tribes Council ajanga nisung tepsetba khukhua aitsür, kechiaser parnoki meimchir takum apayua mali. Iba ama mapa tamajung inyakba menua melie pua ozüng agi melaba ama tapet temerenshi agütsüsü atema Manipur sorkar dang ajungshir, ta NTC ajangasa ashi.

Mangyimer kibong den Nagaland Tribes Council ajanga asükhu lemsateper aser Tulusang Tsüngremi parnok nem tashi tasen agüjang ta sarasademtsür, ta sangdong ajangasa ashi.

## Mangaldoi nung Congress-i Assam sorkar anema lungkak ait



Mangaldoi nung Congress-i Assam sorkar anema lungkak aitdang tangokba yangi noksa nung angur.

**Mangaldoi, September 24, 2021**

**(Agencies):** Brehostibarnü Sipajhar nung tashiyim amshia nūburtem meindokba mapang police-i tim masūba mapa inyakba asoshi Assam Congress-i state sorkar aija lungkak ait.

Sipajhar nung eviction drive mapang lungkak aiterem dak police-i injang khaloktsūba atema Mangaldoi nung state unit president Bhupen Borah-i anir Assam Congress-i lungkak aitba sentong ka ayongzūka agi.

Darrang District indang Deputy Commissioner office kima nung Assam Congress lennirtem aser par nung külem inyakertemi lungkak aita liasü.

Bhupen Borah, Ripun Bora, Rakibul Hussain aser Debabrata Saikia nunger densema Assam Congress

lennir tongti temi iba rally nung shilem agiogo.

"Darrang deputy commissioner aser superintendent of police naprongla mapa nungi agientsü Assam Congress-i takhangba agütsür," ta Bhupen Borah-i ashi.

Kasa mapang, Rajya Sabha MP Ripun Bora-i ashiba agi, ochi nung ajemdaker bushisüngdangtsü ('transparent' judicial inquiry) atema Darrang DC aser SP transfer yoktsü asoshi onoki akhanger.

Sushanta Biswa Sarma ya Darrang district indang SP lir aser pa ya Assam chief minister Himanta Biswa Sarma tenu lir.

Brehostibarnü Assam indang Sipajhar tesem nung eviction drive' aliba mapang, iba tesem nung alir nūburtem aser police

tsüngda raratepba dak sendakba nung bushisüngdangtsü atema Assam sorkari tetuyuba agütsüogo.

**DHALPUR NUNG CAMERAMAN PUOGO:**

Assam police-i Assam police indang official photographer puogo.

Pa ya Bijoy Bonia ta jangjaogo aser Dhalpur nung khatepba indang video ka prokshiba nung pai ali nung longdaka aliba nisung ka dak teka sangshiba menüngoka lir.

"Ni tang Sipajhar nung lir aser tensa osang metetpelar. Video nung yirur aliba nisung ka dak teka sangshiba cameraman puogo. Assam CM Himanta Biswa-i aginüba ama ni CID dang bushisüngdang asütsü tuyuogo" ta Assam DGP-i metetdaksü.

NIT Meghalaya-i SCC tenteter Nongkynrih nem doctorate agütsütsü **Shillong, September 24, 2021 (Agencies):** National Institute of Technology (NIT), Meghalaya-i Shillong Chamber Choir tenzüker Neil Nongkynrih nem honorary doctorate agütsütsü.

Nongkynrih-i kentenbaren nung shilem tajung agiba atema iba naroküm agütsütsü.

October 1 nü NIT indang annual convocation sentong nung Union Education Minister Dharmendra Pradhan-i pa nem

naroküm agütsütsü, ta NIT ketdangstür kati ashi.

"Shillong Chamber Choir nungi Neil Nongkynrih nem onoki honorary doctorate lemtetogo" ta paisa ashi.

Arishi küm 52 tain Nongkynrih-i 2001 küm Shillong Chamber Choir tentet aser iba ya linük nung choir balaka lir.

Tanü tashi pa SCC nung mentor aser conductor ama inyaker.

2015 küm Nongkynrih nem Padma Shri agütsüogo.

## Tripura Assembly Speaker atema BJP MLA Chakraborty shimogo

**Agartala, September 24, 2021 (Agencies):** Tripura Assembly nung Speaker inyaksü atema Hokolbarnü taoba minister Ratan Chakraborty-i takok nguogo.

Tan ita tetenzüklen Rebat Mohan Das-i ajungbena dang Speaker menden nungi sodi agialiasü.

Monsoon Session tenzüikba anogo nung Tripura Assembly Deputy Speaker Biswa Bandhu Sen-i Chakraborty shimba osang metetdaksü.

Iba sülen Chief Minister Biplab Kumar Deb aser opposition leader aser taoba Chief Minister Manik Sarkar nati Speaker tasenba pa indang mendeni meiner ao.

Speaker indang election nung Chakraborty den tetokteper shinga maliasü ta Assembly Secretary Bishnu Pada Karmakar-i ashi.

Züngsem 60 agi akümba Assembly nung CPI-M MLA 16 lir saka parnoki Speaker indang election nung metoktep.

"Ni küm 30 tashi inyaka arur Speaker inyaksü shimogo aser iba atema ni Chief Minister Biplab Kumar Deb dang pelar" ta Chakraborty-i ashi.

Chakraborty-i 2017 küm BJP nung aden aser 2018 election nung Khayerpur constituency nungi takok angu. Tripura nung taoba Congress (1988-1993) sorkar nunga pai minister inyakogo.

## Itanagar nung Kiren Rijiju-i 'Vanijya Utsav' tenzüksü

**Itanagar, September 24, 2021 (Agencies):** Union Law Minister Kiren Rijiju-i Itanagar nung hopta ka piyong agitsüba 'Vanijya Utsav' tenzüksüogo.

Itanagar nung aliba Dorjee Khandu Convention Centre nung Union Minister of state for Education Shubash Sarkar aser tangartem lia Rijiju-i iba sentong tenzüksü.

India linük nüjiso ngur küm 75 abensaba tenüng nung Commerce department-i Director General of Foreign Trade (NER) aser Coffee Board indang Guwahati zonal office den yaritepa iba sentong ayongzükler.

"Atmanirbhar Bharat den külemi Atmanirbhar Arunachal

Pradesh nükjidong atongtsüla" ta Rijiju-i tanü ashi.

"Centre tsüngdang scheme mesüra paper ka dang anendaka meyutsütsü. Nisung shingaia scheme atema sen magütsütsü mesüra meshia magitsüla kechiyong Modi'er sorkari iba inyakyim magizükler" ta paisa ashi.

Iba sentong nung Agriculture Minister Tage Taki, MLA Rode Bui, sorkar ketdangstürtem, aluyimertem aser entrepreneurs aden.

'Vanijya Utsav' sentong nung Department balalai exhibition stalls lapoka lir aser local progressive farmers-ia shilem tulu agir.

## Tripura Assembly elections atema TMC-i campaign tenzüksü

**Agartala, September 24, 2021 (Agencies):** Tripura nung 2023 Assembly elections atema Trinamool Congress (TMC)-i campaign tenzüksü sentong renevdar.

Deobarnü (26.09.2021) TMC-i, Tripurar Jonne Trinamool (Trinamool for Tripura) campaign yimiyim nung ajemdaker maparen tenzüksü.

Iba campaign slogan ya Deobarnü Agartala nung TMC national general secretary, Abhishek Banerjee-i tenzüksütsü.

Iba campaign tenzüksüba den külemi Abhishek Banerjee-isa TMC Tripura state committee aser iba party indang youth committee sangdongtsü.

Abhishek Banerjee-i ashiba agi, "Assam aser Tripura nung nüboyim mapa tenzükgogo. Tripura nung TMC-i takok angutsü."

"Küm asem nung India nungi BJP atüngdoktsü kü nükjidong lir" ta West Bengal kübok Murshidabad nung rally ka ayonga agiba mapang Abhishek Banerjee-i ashi.

Tawa, Tripura nung TMC pur rally (padyatra) ana tashi ayongzüktsü nokdanga liasü.

Iba dak sendakba nung Tripura Sorkari West aser East Agartala police station tesemtem nung Section 144 CrPC kübok curfew ozüng agütsüogo. Iba ya November 4, 2021 tashi alitsü.

### GOVERNMENT OF NAGALAND

#### DIRECTORATE OF WOMEN RESOURCE DEVELOPMENT NAGALAND, KOHIMA.

NO.DWRD/DEV/MTC-4/2021

Dated Kohima, the Sept, 2021.

#### ADVERTISEMENT

The Department of Women Resource Development invites applications for School dropout female candidates who are Indigenous inhabitants of Nagaland and are willing to undergo 2 (two) months course programme for enabling self employment at Multi Training Centre (MTC), Bayavu, Kohima and Multi Training Centre (MTC), Purana Bazaar, Dimapur in the Trades of Tailoring and Knitting.

Application addressed to the Director, Women Resource Development in plain paper stating bio-data, 2(two) recent passport photographs, self-attested copies of relevant mark sheet, birth certificate and any other relevant documents are to be submitted

#### FOR KOHIMA, MTC

- \* Application to be submitted at Directorate Office, Bayavu colony, Kohima.
- \* Interview will be held at MTC Meriema (near Nagaland University) on 4th Oct. 2021 at 10:30 am onwards.
- \* All intending candidates to be at the centre by 10:00 am.
- \* One seat will be reserved for people with disabilities (PwDs). If not filled by the PwDs the seat will be allotted to the general category.

#### FOR DIMPUR, MTC

- \* Application to be submitted at MTC, Purana Bazaar, Dimapur.
- \* Interview will be held on 4th Oct. 2021 at 10:30 am onwards.
- \* All intending candidates to be at the centre by 10:00 am.
- \* One seat will be reserved for people with disabilities (PwDs). If not filled by the PwDs the seat will be allotted to the general category.

The last date for submission of applications in both the centres shall be 1st Oct, 2021 and results of the interview will be declared on the same day, classes to commence on 6th Oct. 2021 for both the centres at Kohima and Dimapur.

#### Eligibility:

- |                         |   |    |                                     |
|-------------------------|---|----|-------------------------------------|
| Education Qualification | : | a) | Class VI Passed for Knitting        |
|                         |   | b) | Class VIII Passed for Tailoring     |
| Age                     | : |    | 18 to 35 years as on 1st Oct. 2021. |

This advertisement is issued with the permission of respective D.C and DTF vide letter NO.DCK/CON/COVID-19/2020 (VL-V) dt 20th Sept. 2021 and NO.DCD-33/COVID-19/2021-D/2049 dt 14TH Sept. 2021 for Kohima and Dimapur.

Sd/-  
(VILONE SAKHRIE)  
Director.



## TIR YIMYIM YIMOBILEM (EDITORIAL)

DIMAPUR KÜPTOKNÜ, RONGJUI (SEPTEMBER) 25, 2021

### Tetsübutüsü Assam Police

- P Tiamongba Aier

**T**aküm Assam nung Chief Minister Himanta Biswa Sarma-i anir BJP sorkar akümba sülen police-i tashiyim mapa inyakba aiben ataloka arur. Tesüiba ita ishika tsüngda Assam nung police-i nisung khasetba aser yirutsüba lendong aiben atalokogo aser nisung aikati iba ya tashiyim mapa ta aija arur. Assam Police-i tashiyim mapa inyakba azüoktsüla ta jembia aruba mapang ka nung ano Brihostibarnep Assam kübok Darrang district nung police-i ali atsünga agirtem meindokba indang video ngua nisungtem aoksadaksüogo. Iba video ya social media nung aser talisa WhatsApp telok balala nung kanga prokshir aser iba nung Assam Police-i Sipajhar tesem nung ali atsünga agirtem meindoktsü merangdang nisung ka dak injang khaloktsüba aser azükba sayur. Aji dang masü saka district administration-i hire asüba photographer katia ali nung laoa aliba nisung ka dak teka sangshiba video nungsa angur aser iba ama taochi melii mapa inyakba ngua aoksar aser kasa mapang tsüba bilemer. Iba lendong nung nisung 2 tashi taküm samaba osang angazükogo aser lokti balala den political party temi iba inyakyim atema Assam state sorkar aitsüba sülen sorkari bushisüngdang asütsü tetuyuba ka agütsüogo. Osang angazükba agi Darang district administration-i Bodbar nikongdang Kirakota Char nung alirtem dang ali toktsür aotsü shidi agütsü aser iba anema Brihostibarnep lungkak aitba sentong ka agi. Idangji district administration-i Kirakota Char nung alirtem dang parnok memeindokdang parnok alitsü atema ali balaka agütsütsü ta nangzük saka police-i injang khaloktsü. Lendong atalokba tesem nung ya Muslim nunger teimba lir aser parnok ya East Bengal nungi arurtem lir. Iba jagi CPI(M)-ibo Assam sorkari nübo agi tangar memenepertem dak tenük yoka police nem tashiyim mapa inyakdaksür ta tai tongloktsüogo. Külen, Assam Congress-ia Covid wara mapang iba ama mapa inyakba ya meimchir tangatetba anema aser Supreme Court tetuyubatem alema lir ta sorkar dak tai tongloktsüogo. Dholpur nung alirtem ya 1970s nungi iba liyonga arur aser tashiyim agi parnok meindokbaji tashiyim mapa ka ta Assam Congress-isa shiogo. Atangji Assam nung tang aliba BJP sorkar ya tesüiba sorkar dang nungi khenyongi balaka lir aser repringdanga aru nung parnoki police nem tashi bendanga agütsür inyaksangshidaksür amai ajiteter. Taküm May 10 nü Himanta Biswa Sarma-i Chief Minister inyaktsü tenzükba sülen pa atema tongtipang teinyaktsütem rongnung arrtsü mangatettep aliba onüktem asütsü ta nangzuka liasü. Iba sülen mapang tatsüka dang lirbo Assam-i arrtsüa aliba state tem den rara menatsü mapa inyak. Taoba ita tetenzüklen Mizoram den arrtsülen Assam police-i injang khaloktsüba sülen tensa kanga mejungi akümba asenoki bilemteter. Yamaji Meghalaya arrtsülen-a parnokisa tashiyim inyakogo aser talisa Nagaland den arrtsüa aliba tesem nunga parnoki tashiyim agi police outpost yangluba ajanga tensa mejungi akümba asenokia ajangshiogo. Assam Police-i pei state litsü telongtet nung küm aika liyonga arur dang taochi tera danga mesayui injang khalokja tashiyim mapa inyaketer süra, parnoki maongka dang ngura tangar dakbo iba den tamajungba inyaktsü akok. Anungji Nagaland kübok Assam den arrtsütepa aliba tesemtem aser talisa arrtsü mangatettep aliba tesemtem nung alirtem kanga kümdanga alitsü mapang ka lir. Assam sorkari inyaksangshia aruba ya repringdangra, shibai metet Assam state ketdangsurtem aser police-i kulikaket ka dang bener arua tangsa iba ali toktsür oang ta asenok dangi arutsü ana nung dang lir. Idangji asenoki tekong meranga noktakra parnoki taochi kecha mesayui dang asen taküm agitsü mesüra kanga mejungi tenük-telen yirutsütsü. Anungji Assam police ket nung tai maketba takümtem melaludang Nagaland sorkari Assam sorkar den arrtsü ken o tem tekaratiba nung angatetteptsü mesüra tenangzüktep takang kar agia ayutsü mapang tongja tongogo.

## OLEMSABANG

### TEKÜMTET BUSHIBA MAPANG KA TONGJA TONGER LIASÜ

- T Kikanaro Jamir, Retd H/m Signal Angam, Dimapur.

Luke 15: 17 Saka kodang pa temulung tanga aru pai ashi, kübu den ayanger tem kwika chiyungtsü peria aser ano talia angur, saka nibo idaki taya agi tasür.

Iba ya Temadokba chir ka indango-entepba agi Yisui jembitsü tenzük : Kechiba Yisui o- entepba ya amshi ta sura Pa mapang nung alima meimchirtem tashitemeteba kanga dang (advanced) tejakleni oadoker liasü. Alima rongsen jatetba mapang ka liasü. Takar tem rong nunga takarnaktem liasü. Oda Doctor dentist temia tebu melentsü (teeth) bushia aruertemia (gold) hon tebu agi melenteper, alizüka inoker jajaba mapang ka liasü. Dr Luke-ibo sayutsüngir Apostle Paul sulen pa yangko bener anidak. Parnoki science mapa study bushitetba ya bo kokadoker liasü. Iba alima zünba tensa nung yisui tekümtet inyakyim ya sayutsü mapang tongogo ta meteta pai pa teaching method ka ama iba temadokba chir indang demonstration class ka ama agitsü tenzük. Kechiaser iba putu tensa nung meimchirtemi tekümtet ya koda sur angutsü ta bushiba mapang tongadoker liasü.

Anungji Yisui ano pa tebang lapoka ashi: Luke 15: 13 Anogo ishika lir külen Jabaso tanübosangi pei oset ajak bener alima talangkati aeini ao. Idakji pai pei rongsen lalushibonga temenen benshia ali.

Yisui shinubaji iba asangur ya alima shisatsü samaba indang masü, saka tanüla shisatsü seret matuba, tanüla rongsen samadokba indang sayur. Kodang iba asangur Tsüngrem temeim nungi pila jen pila ao. Pai pei metetba shisatsü nung dang metaloker liasü. Idangji memeteti tamakok ka ajuru. Pa takoksa tia kati iadoker liasü, teyimla kenyongi samadok. Ibaji kechi ta sura frustration aser depression jenjang agi melenadoker nemzua liasü. Yamaji memeteti pa ponglang makaba ongkün kati iadoker liasü. Lasa, lasa oda, pa tembartemia toktsü. Pa temulungjang kokrokadoker liasü.

Luke 15: 14 Aser pai pei rongsen ajak endokmar külen iba lima nungji aya-wara kanga tulu ka adok aser pa kanga sensak aten. Iba aya-wara ya taküm sotba makamait, chiyungtsü wara indang masü saka tanüla rekongba, tanüla ala-ashiba wara ka alitsü. Mati 16:26 nungji yamai shia lir. Kechiaser nisung kati alima ajak ajangzükter pei taküm samara, pai kechi ajangzüktsü, mesura nisung kati pei taküm melen kechi agütsütsü. Iba ya asangur ka asoshi dang masü, aiur jala ka asoshi, tebu ka mesura tetsü taküm ka dena medemdangtsü akok. Areshi küm 50 mesura kar küm 60, kar joko küm 70 ajunger saka Laishiba menungra maiter aser sarasadem mesünur, iba asangur den sakü alitsü.

Luke 15: 15 Idangji iba lima alir nubur rong nung ka den pai semloka ali, aser kibur jagi moapu nung ak anuktsü yok. Asen lima nungbo ak ya jenjang tulu aser ak metsüba ajanga kibur ajangzükdaksür. Saka laishiba o ratet nungibo tepet zük tia, shiruru ama tanüla lurepa doker aliba ka den dang medemdanger.

Luke 15: 16 Aser ak-i achiba matsüklashi teküp achitsü pai yongya saka shingaia pa nem kecha magütsü. Iba tetezü jenjang kar ngula sung ta ? jenoktsü asoshi pai lenmang palala nungi teyari palala bushi. Saka shingaia pa meyaritet. Kechiyong pai lenmang tai nung nokdaka liasü.

Luke 15: 17 Saka kodang pa temulung tanga aru....tetezü pa temulungjang tejenba lenmang nungi tasenba lenmangi meyip, ibaji tekümtet lenmang alitsü yangji pa asentenshi tenzük. Kotak tebu Tsüngremi pa lenji aru aser pa nem tola tasen agütsü. Pa nem tsüngsem tasen agütsü, pa nem küri tasen ka agütsü. Itemji Tsüngremer tematiba kotaker rongsen shisatsü alitsü. 2 Korint 7: 10 nung yamai ashir. Kechiyong Tsüngremi mulungba ama to jashidaksüba agi tanaben mesasatsüsa tekümtet asoshi temulung meyipdaksür. Saka alima tejashibai tasüba adokdaksür.

Iba asangur asoshi alima temeim mokong mokonga kümadoker liasü. Saka kodang pai tebu kidang meyip, pa temulungjang nung Tsüngrem temeim anutsüng ama yaloktsü. Pai Tsüngrem dang pa temenen mapatem nangzük. Yisu temeshi azüi pa meruktettsü. Anungji dang iba asangu taküm ya sungdong tera temeshi kümdaksüba ama molutet. Pa teti tatem maka tarutsü yimti nukla liasü.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerí angateta agitsü mepishir**

## UK nung Arogo lenirtemi Afghan refugees agizüksü mepishir



London nung alir Afghan nungner aser parnok pusemertemi Afghan nungner refugees agizükang ta takhangba agüja longkak aitba noksa nung angur.

**September 24, 2021:** UK nung Arogo lenirtemi ketdangsertem dang Afghanistan nungi aruba refugee kibongtem agizüksü mepishidar.

Afghan Welcome teloki ayongdenba Arogo lenirtemi local ketdangser shia dang Afghan refugees kibong 10 bosa agizüksüla, ta mepishir.

Afghan nungi aruba refugee tem tang 'bridging hotels' nung jenokdakja lir, ajisüaka ibaji khenpiga atema jenokdaksüba dang lir.

Arogo lenirtemi ketdangsertem dangi züluba shidi nungji yamai zülua lir, "Coronavirus wara mapang nung nenoki linük tesem ajungalen nüburtem yariba atema onoki nenok dang pelar. Tang asenoki alima nung tayongzükba tasen ka ajangshidar. Nenok ama onokia Afghanistan toktsür jena oner nisung meyrjang aika atema shisabulua bilemtsür. Onoki nenok dang Afghan refugee tem agizüksü mepishir."

Shidi nungji sign süa alirtem rongnung Afghan Welcome nungi Krish Kandiah, Baptist Union of Great Britain nung General Secretary, Rev Lynn Green aser Bishop of London, Sarah Mullally aser Bishop of Durham, Paul Butler na densema Church of England nungi putir aika densema lir.

Taoba ita Taliban teloki Afghanistan linük agiba sülen sorkari local ketdangsertem dang Afghanistan nungi jena arurtem jenokdaksütsü atema mera agia inyang, ta metetdakja liasü.

Tang UK nung Afghan nungner refugees 8,000 shi jenoka lir aser sorkari Afghan nungner 20,000 jenokdaksütsü nangzükba lir.

Tang tashi nung council 100 dak temai refugee tem

jenokdaksütsü atema melungogo saka sorkari ano maneni tanungba councils danga Afghan nungner refugee tem jenokdaksütsü atema nangzükang, ta mepishir.

Yimjak nung züluba shidi ka ajanga Arogo lenirtemi, coronavirus wara aliba nung ajemdaker ketdangsertem sadema meinyaktetba jenjangji onoki angateta lir, ajisüaka linük tesem ajungalen Arogotemi Afghan nungner refugees jenokdaksütsü atema yaritsü renema dang lir, ta metetdaksü.

UK nung Arogotemi sorkar dang Afghanistan nungner kümzüksü aser parnok jenoka lidaksütsü atema yakta nungi mepishia arudar.

Taoba ita House of Lords nung jembidang Canterbury nung tongti putir, Justin Welby-i, "Afghanistan nung asenok den amalitepa tenzükera aika lendong nung lir, aser asenoki parnok dang taochi sayutsüla," ta metetdakja liasü.

Welcome Churches network-i nüburtem dang, Afghanistan nungi kibongtem UK-i anir arua jenokdaksütsü atema Emergency Afghan Fund atema tenla agüjang, ta mepishia tenla bendendar. Iba Fund atema inyaker rongnung ka- Dr Krish Kandiah-i, "Afghan refugee tem nungdak perija parnok dang Khrista temeim sayutsü atema UK nung aliba Arogotemi inyaker. Rara aliba tesem (Afghanistan) nung kibongtemi parnok akokba tashi dang bener iba linük toktsür jenogo aser parnok UK telungi aйдang parnok asenok dang nungi temeim nungdaksü," ta metetdaksüo.

UK nung Arogotemi Afghanistan refugee tem yaritsü atema lenmang asem lir- mezüngbuba nung parnok atema sarasademjang,

tanabuba nung Welcome Churches network nung shilem agiang aser tasembuba nung nungdaksütsü yaritsü atema tenla agüjang, Welcome Churches network-i metetdaksüo.

Arogoi ashiba agi, 2015 küm nungi tenzükera tang tashi nung parnok Syria nungi refugees aser Afghan nungner oshi meyipzükertem kibong 250 jenokdakja yariogo.

Taoba ita Taliban teloki Afghanistan linük agiba sülen nisung aikati iba linük toktsür tanga linük balala nung jenoka alitsü bilemdar.

Chelmsford nung tongti putir, Guli Francis-Dehqani aser Arogo nung Refugee Coordinator, Rev. Canon Gareth Jones nati nüburtem dang Afghanistan atema sarasademtsüba den külemi iba linük nung timtemertem ajak asoshi sarasademjang, ta mepishia metetdaksüo.

Tenati sangdong ka ajanga, "TV screens nung asenoki Afghanistan nung tensa raksar aliba angur aser nüburtem timtembaji asenoki masadangteter. Tang ama tensa ka nung nisung aikati parnok yaritsü atema shisadangdar," ta metetdaksü.

"Khrista tenung nung Arogoi timtemertem aser reshikangshi nung alirtem yaritsü aser tang ama timtem tensa ka nung Khrista aliba jungkai adokdaksütsü atema inyaksü. East London aser Essex kübok ozü Arogotem ajaki refugee tem yaritsü atema renema lir," ta tenatasa metetdaksü.

"Ozü Refugee Engagement Team renema lir aser taruba itatem aser kümtem nung Afghan refugee tem agizükba den parnok yaritsü atema Arogotem renema lir," ta tenati metetdaksü.

## ANO GO ABEN TSÜNGREM DEN

### TEKÜMZÜKER SANNÜKER

"Saka atangji sayuba den apet O nai jemiabang." Tita 2:1

Ano teyari asoshi tangatetba tanelaji külem temeshi pur telungjem aser Tsüngrem tenzükertem arur. Khristan shinga peisasa agi teperiba makümer. Telok ka kisung agi tabensa mekümtetter. Asenok kati ka nungdaker. Kodang asenok shirangdir temang ajunga agi iba mesen anema rarar. Kasaji tiyazü tesayuba mopung aser yipru anema raratsü asoshi liyim arogo (Khrista Temang) aser Pa lima rangpen Temang nungdaker. Asenok joko tiyazü tesayuba mopung agi septsü tentsü len monshidaksütsü asoshi arogo nung tenzükera balala nem shia aruba Khristai sempet balala agütsü (Ef. 4:11-16).

Yihuda nungner masüba Khristanem mejeptoktsü jembitsü Yirusalem mungdang jatepba nungi asenoki lesson ka angazükera. Kecha tependang meli-i Tanela Temeshi meküploksüba tenyar Peteri kuli asü (T.M. 15:6-9). Iba indang Yakobi kechi "zülua" lir ta meyipa ashi (t.13-17). Aser ibai obang ka küma hai-aura katepa renem (t.22-28). Iba nungi tamangertem asoshi "tepela", "tajungshiba" aser "tashi" angu (t.30-32). Tamburtem aser tanishirtem dang asüngdangbaji Arogo otsü bushiba lir.

Kümdanga bushiba ajanga Arogo nung tesüba pututem nung mapa tasen adoka sayua arubaji walok-watem tekülemba liasü ta bushiteta arur asüngtetsü. Asentenshi mapang nung Tsüngrem mapa den küpteptsü asoshi Satan aser pa tenyarterm mazüngi mapa inyaker. Ibai tesüba Tsüngrem mongin. Jonathan Edwards ama taküm kuli lir (1703-1758). Pa iba putu nung America nung philosopher aser theologian tulutiba liasü.

Tanü tesayuba nung tashishitsü aketba tasüngdangbatem noktangtsü asoshi tangara lir, "Süngjangji repringang." Saka taküm yimya melenshibaji dang "süngjangji" masü. Osangtajungji kanga tashi tait lir, nai ibaji tanga den meyoktepaka iba nung tajung kar adoktsü! Yisu dang nütsüngtemi parnok chiyongtsü bushitsü yokadokang ta ashidang, pai parnok dang chiyongtsü agüjang ta ashi, "Ni lokti asoshi aria bilemer" (Mt. 14:15, 16; 15:32). Sannüker kaji santer asoshi aria bilema chiyongshidak; tesayuba shidak agütsür lir.

Satania kotak tenyar ama kümer sayutsü akok, saka mapaji tatem anogo nung metettsü (2 Kor 11:13-15).

Temeim Oba Tsüngrem, temeshiba aser memeshiba bendangtetsü tanela shisatsü kü nem kua. Yisu tenung nung sarasademmer, Amen.

## Scientist temi Sodom-Gomorrhah yimti ngutetogo ta amanger

**September 24, 2021:** Scientist temi ngutetogo ta amanger nungi 'meteor' ka jaksaba sülen alima nung tsükba kuli ngutetogo, aser ibaji Laishiba nung shia aliba Sodom aser Gomorrhah yimti asütsü akok, ta parnok bilemer. Iba tesemji Jordan linük nung lir.

Scientist temi ngutetba report ji journal Nature nung metetdakja lir.

"Küm 3,600 tejaklen Tell el-Hammam, Jordan nung lendong tuluka ataloka liasü, aser ibaji ajanga tang ali telung nung mijang jenti rema aliba ngutetogo. Iba yimti aser yimti temeket nungji tajemba agi nisung 50,000 shi liasü," ta scientist temi metetdaksü.

"Ibaji ajanga anung nungi mi alu aser yimti nung alirtem ajak asü; iba sülen yimti nung metzü tali aliba agi putu aika iba region nungji nisung maliasü," ta parnokisa metetdaksü.

"Iba tatalokbaji 1908 küm Tunguska, Russia nung bomb lendong atalokba dang nungia kanga tesashiba liasü asütsü akok. Ibaji ajanga yimti nung aliba kiojen ajak raksatsü aser ali ajak lenden aküm aser nisung jenti asü," ta scientist temi metetdaksü.

Laishiba nung Lipok tapu 19 nung Tsüngremi mi-long ajanga Sodom aser Gomorrhah yimti samatsüba indang shia lir. Tasüngnüji Abraham-i iba region nung mokozü tulu anguba indang Laishiba nung shia lir.

Iba yimti nungi ajendang Lot kinüngtsüi yimti meyipa repringba ajanga la metzü tongshi akümba Lipok 19:26 nung shia lir.

Scientist temi ashiba agi, iba ya 1650 B.C nung atalok asütsü akok. Ajisüaka Laishirtemibo 1650 BC küm aika jakdang Abraham liasü. Christian ministry, Answers in Genesis-ibo akhidang Sodom aser Gomorrhah alibaji tesemji tang aliba Tell el-Hammam masütsü akok, ta bilemer.

Scientist temisa, "Lipok kaket nung Tasü Tzüyim area nung aliba yimti nung ibaji atalok asütsü akok, kechiyong tatalokbatem kuliji shidak angur. Tatishitsü agi: (i) anung nungi long tsük; (ii) anung nungi mi alu; (iii) mi nungjagi mokozü tulu adok; (iv) yimti shilem tulubaka raksatsü (v) yimti nung alirtem asü aser (vi) yimti nung aliba aonsotsü ajak samatsü," ta metetdaksü





Bengaluru, September 24, 2021: Hokolbarnü Lok Sabha Speaker, Om Birla-i Karnataka assembly nung jembitsü atema arudang tangokba noksa nung angur. Kasa noksa nungsa Karnataka Assembly Speaker, Vishweshwar Hegde Kageri aser State Chief Minister Basavaraj Bommai nata angur.

## Qaud senden jakdang PM Modi-i Australia PM Scott ajuru

**New Delhi, Rongjui/September 24 (Agencies):** US nung Quad senden jakdang Ato kilonser, Narendra Modi-i Australia Ato kilonser, Scott Morrison ajuru senden amendang linük ana dak sendakba onüktem, regional onüktem aser Indo-Pacific densema International onüktem aika süoka o lemtepego.

Hopta ka tejaklen Modi aser Morrison nati phone ajanga India-Australia Comprehensive Strategic Partnership indang jembiba sülen Brihostibarnü tena ajurutepe senden amen.

Osangbenertem den jembidang Foreign Secretary, Harsh Vardhan Shringla-i, "Tenati yaküm June ita nung senden amenba sülen inyaka aruba ajak asadangogo aser maneni linük ana tesendaktep

tajungba akümtsü atema amalitepa inyaksü bangjemogo," ta metetdaksü. Yaküm June ita nung Leaders' Virtual Summit mapang nung India aser Australia nati linük ana tsünga Strategic Partnership aliba nungi Comprehensive Strategic Partnership yanglua liasü, ta Ministry of External Affairs (MEA)-i sangdong ka nung metetdaksü.

"Ato kilonser anati linük anaprong ajungtsü atema maneni amalitepa inyaksü jembio," ta kasa sangdong nung shia lir.

Tesülen Morrison-ia twitter ajanga, "Ni US semdangba mapang nung kü tembar aser Australia tembar tajung ka, India Ato kilonser Narendra Modi jangratema ajuruogo," ta metetdaksü.

"Quad senden jakdang tongtibang onük aika nung o lemstepogo aser linük ana tsünga tesendaktep ano tajungba akümtsü atema jembio," ta paisa metetdaksü.

Modi-ia twitter ajanga, "Kü tembar tajung, PM @ScottMorrisonMP den mapang shia o lemteptsüji jangratemtsüka. Künati commerce, shishilembaba aser tanga sector aika nung maneni amalitepa inyaksü atema jembio," ta metetdaksü.

Quad senden nung linük pezü- United States, Japan, Australia aser India linüktemi Indo-Pacific redgion atema tongti ser jembitsü. China-i Indo-Pacific region nung kanga ambangyima inyakba mapang ka nung 2007 küm mezüng Japan-i ketdangsüa iba senden ayongzüka liasü.

## Maoists-i kongshiba states nungi CMs den Amit Shah-i senden amentsü

**New Delhi, September 24 (Agencies):** Amongnü Delhi nung Union Home Minister, Amit Shah-i India nung Maoists telungpurtemi timtem agütsüba state ter nungi chief minister tem den senden mena tensa asadangtsü aser kasa senden nungsa security asalentong yangluba den külemi terenlok onüktem atema jembitsü.

Osangbener den jembidang ketdangser kati, "Iba senden ya kanga tongtibang asütsü, kechiyong iba senden nungi Maoists-i timtem agütsüba state 10 nung left-wing extremism (LWE) anema asalentong yanglutsü," ta metetdaksü.

Vigyan Bhawan nung ayongzüka senden nungi Chhattisgarh, Jharkhand, Bihar, Odisha, Andhra Pradesh, Maharashtra, West Bengal, Uttar Pradesh, Kerala aser Madhya Pradesh state tem nungi chief minister tem adentsü, kar medentetyonga CM-i pa/la melen ketdangsertem yoktsü. Senden nungi Chief Minister temi peipei state tensa metetdaksütsü aser terenlok project teinyakdak osang metetdaksütsü.

Maoists dak sendakba senden ya tensa apir küm shia khen mesüra anabenbosa amener, ajisüaka coronavirus

wara aliba agi yakümbo senden mamen.

Senden nungjisa Chief Minister temi Maoists telungpurtem aziüoktsü atema state sorkari inyaka aruba osangtem metetdaksütsü.

Kasa senden nungi state ter nungjagi Director Generals of Police aser chief secretaries den paramilitary forces tongti ketdangsertem adentsü. Senden nungi Intelligence Bureau (IB)-i Maoists dak sendakba report ka agütsütsü.

Centre tsütsülen nungi Union Home Secretary Ajay Bhalla, IB Director Arvind Kumar aser Home Ministry nung tongti ketdangsertema senden nungi adentsü.

Osang angazükba agi senden nungi talisa Chhattisgarh, Jharkhand, Odisha, Andhra Pradesh aser Maharashtra state tem nung state sorkar- police aser paramilitary sepaitem amalitepa inyaksü atema jembitsü.

"Centre atema tongti nükjidongji Maoists tongti lenirtem aputsü mesüra surrender südaksütsü atema lir, koba ajanga Moaists-i timtem agütsüba state tem nung terenlok aser yimjung alitsü," ta ketdangsertemisa metetdaksü.



September 24, 2021 nü Chandigarh nung senden ka amenba mapang nung Haryana Chief Minister, Manohar Lal-i Union Finance Minister, Nirmala Sitharaman nem 'Bhagvad Gita' ka sempet agütsüba noksa nung angur.

## India nung ano nisung 31,382 dak Covid putet

**New Delhi, September 24 (Agencies):** India nung ano nisung 31,382 dak coronavirus putetogo aser tang tashi nungbo linük nung nisung ajak senteper 33,594,803 dak iba tashidak putetogo, ta Hokolbarnep 9:00 ako nung Ministry of health & family welfare-i metetdaksü.

Tesüiba ghonda 24 tsünga India nung coronavirus agi shiranger 318 süogo aser tang tashi nung iba tashidak agi asür

ajak agi 4,46,368 jungogo. Tang India nung coronavirus tashidak agi teshirangdakpur 3,00,162 dang kümogo, tesüiba ghonda 24 tsünga shiranger 32,542 anepogo aser tang tashi nung shiranger ajak senteper 32,848,273 anepogo, ta Health Ministry-i metetdaksü.

Taküm January ita nung coronavirus vaccination tenzükba sülen tang tashi nung

vaccine dose crore 84.15 dak tema agütsüogo aser iba nungi tesüiba ghonda 24 tsünga vaccine dose lakh 72 agütsüba densema lir.

Ano külen tanga osang ka nung Centre sorkari, states aser Union territories nem tang tashi nung coronavirus vaccine crore 81.39 dak tema agütsüogo, aser ano maneni dose 85,92,550 agütsütsü renemdar, ta metetdaksü.

## Himachal nung tzüngluruwa mongpu nung nisung 432 süogo

**Shimla, Rongjui/September 24 (Agencies):** Taküm Himachal Pradesh nung tzüngluruwa mongpu nung tzünglu dak sendakba lendong balala nung nisung 432 süogo, aser ibaji state nung tesüiba küm pongu tsünga tzüngluruwa mongpu nung nisung timtiba asüba lir, ta Hokolbarnü Disaster Management Authority-i metetdaksü.

Tesüiba ghonda 24 kija nunga state nung tzünglu dak sendakba lendong nung nisung 12 süogo, ta kasa osang ajangasa metetdaksü.

State nung tzüngluruwa mongpu nung anentsüh lendong aika atalokba den külemi lenmang aika raksa aser talisa state yimtiba, Shimla aser Lahaul-Spiti district nungbo temperature kanga ajema aküm.

Lahaul-Spiti valleys nung tzünglu kanga aruba aser rürjep alaba ajanga tesüiba ghonda 24 tsünga gari junga mesenzütet aser gari lendong aika ataloka

liasü.

Osangbener den jembidang Superintendent of Police Lahaul Spiti, Manav Verma-i, tzünglu maneni aruba nung ajemdaker ainlen senzürtem dang taruba ghonda 24 tsünga ainlen mesenzütsü tekümdangtsü metetdaksüogo, ta ashi.

Meteorological Department-ia taruba anogo ana atema 'yellow warning' metetdaksüogo; taruba anogo ana maneni tzünglu kanga arutsü aser ibaji ajanga anentsüh aluba den gari lendong ataloktsüa akok, ta parnoki metetdaksü.

State Chief Minister, Jai Ram Thakur-a helicopter ajanga Bilaspur-i aotsü sentong liasü saka tzüngsang mopung majungba agi thinen.

Hokolbar anepdang Una nunga truck kati motorbike ka dak tsükoktsüba lendong nung bike nung mena alir police ana iba tesem nungjisa asü aser police ka tesülen asü.



September 24, 2021 nü Jammu nung CPI (M) lenir, MY Tarigami leniba nung Centre of Indian Trade Union (CITU) züngsemtemi takhangba balala agüja longkak aitba noksa nung angur.

# Temerenshi tesashi maneni amshitsü: Taliban ketdangsür

**Kabul, Rongjui/Sept. 24 (Agencies):** Taliban tenteter aser 1990s mapang Afghanistan nung yimsü asüdüng par ozüng tesashi amshir kati ashiba agi, temerenshi agütsüba aser teka alangzüka yokba maneni inyaksü saka yimjak nung masütsü.

The Associated Press news agency den sensaksem dang, taoba mapang Taliban-i temerenshi agütsüba Mullah Nooruddin Turabi-i bukuma jembia aser Afghanistan nung yimsüsür tasen anema teka maittsü alima dang tekumdangtsü ashi. Taoba mapang parnoki yimsü asüdüng stadium ka nung nisung adenshia yur temerenshi agüja liasü.

"Stadium nung temerenshi agütsüba atema ajaki onok aitsü, saka onoki kodanga parnok ozüng aser parnok temerenshi indang kecha mashi," ta Turabi-i Kabul nungi AP dang ashi.

"Shingaia onok dang onok ozüng komala asütsü ta mashitsü. Onoki Islam sülen anidaksü aser Quran nung aliba ama ozüng yanglutsü."

August 15 nü Taliban-i Kabul atsüdüngdoka linük amokbangba sülen Afghan nung aser alimai parnoki 1996-2001 mapang yimsü asüdüng amshiba ozüng tesashi amshitsü asü masü, ta repranga atar.

Tang arishi küm 60 shi alisang Turabi ya taoba mapang Taliban-i yimsü asüdüng justice minister aser Ministry of Propagation of Virtue and Prevention of Vice nung tekolakba inyaka liasü.

Iba mapang alimai Taliban indang temerenshi aitsü, koba Kabul indang stadium mesüra Eid Gah Mosque kima agütsü, aser yangji Afghan nung tebur aika arua dena liasü.

Nisung tepsetba nung aitsürtem dak tekolak nung timtem ajurur alir kinungertemi injang ka khalokja kaset, aji mesüra aibelen melen sen meshia (blood money) mapa tamajung inyaker taküm mesamatsü.

Auyaba nung aitsürtem teka ka alangdokja merenshi aser highway nung auyartem teka ka aser tetsüng ka rangdokja liasü.

Ken o jembiba ya timba yimjak nung magi aser obendanger ya timba Islamic scholar temi aginüba ama inyak, shirnoki tamangba yimsü nung ajemdaker ozüng angateta amshi.

Tangbo tetsürtem densema obendanger temi ken o jembitsü saka Afghanistan ozüng tamendak dak ya Quran alitsü, ta Turabi-i ashi. Kasa temerenshi amshitsü, ta pai ashi.

"Security atema teka alangzüka yokba ya kanga nüngdak lir. Yimjak nung temerenshi agütsütsü atema cabinet-i asadanger aser sentong ka yanglutsü," ta pai ashi.

Pakistan nung küm 20 jenoka lir Afghanistan-i meyiba shilangsang, Turabi-i tawa Al Jazeera den sensaksemba mapang, justice system ya taoba Taliban totuyuba nung ama alitsü saka temelenshi kar alitsü, ta shia liasü.

"Onok mapa ajanga onok ya America nung ama masü ta sayutsü, shirnoki meimchir temeden asoshi nodaker ta jembir saka mapa tamajung inyaker. Joko reshikangshi aser ayaba malitsü," ta Turabi-i ashi.

"Onok constitution ka lir saka yangji onoki temelenshi benoktsü, aser item temelenshi nung ajemdaker civil aser criminal code aser civilian tem atema tzüzüng-ozüng

yanglushitsü. Islam ozüng aser meimchir ozüng zülen anidaksü, anungji tepuokdak alir kanga agi tajemba alitsü."

September 10, 2021 nü Kabul nung longkak aitba mapang nisung pezü tepsetba indang Turabi-i mashi mesüra osangbener reshikangshia amshiba aser tepuokdak civilian tem merenshiba indang kuli tali timba ngutetba indang pai mejembi.

"Nüburtemi ozüng kar atema shisabulur, tatishitsü agi teka alangzüka yokba ama. Saka ibai nüburtemi akhangba lir. Nai nisung ka teka kalen alangzüka yokra, pai tanaben kasa mapa tamajung meinyaksü. Tang nüburtem ochimashi kumogo, dangar dang tashiyim agi sen meshir, sübokrem agir," ta pai Al Jazeera dang ashi.

"Onoki yimchi-yimjung bener arutsü. Onoki ozüng benokba sülen shingaia aji meraksatsü."

Tawa Kabul nung Taliban züngsemtemi temerenshi ka parnoki taoba mapang amshiba tanaben amshir, kong tila-teri auyaba atema yimjak nung maksütsüba.

Taoba hopta Kabul nung alir kar pick-up truck tesülen teka alenloker maksüja anir senzua liasü. Nisung karbo parnok auür ta jangjatsü atema tejak nung sentsü nülokja liasü. Nisung kar tekong nung amtsük tamajung sendakloksü mesüra tebang nung nemtsü. Ajisüaka parnoki kechi aibelenar mejangja.

Turabi ya tekolak nung sü temesüng ka nailoker bangsemo temesüng agi tejak sünger tetsüng atoka jaja liasü. Pa ya 1980s mapang Soviet sepaitem den raradang tetsüng ka aser tenük külen yirua liasü.

Taliban sorkar tasenba kübok pa ya prison ketdangsür lir.

# Russia nung anogoshi COVID-19 agi asür timba akumer

**Moscow, Rongjui/Sept. 24 (Agencies):** Russia nung taoba mapang otsü yanglua coronavirus agi asüba den kasa Brehostibarnü asü, kong Delta variant den meyokteper mozü agiba maparen ilonga meinyakba ajanga iba tashidak menar tali akumer. Tesüiba ghonda COVID-19 agi asür nisung 820 aser tashidak menar nisung tasen 21,438 liasü. August ita tatemlen iba linük nung tasüba ya kasa liasü.

COVID-19 cases züdüngdangba tsütsü alima nung Russia ya jenjang pongububa nung lir, aser vaccination terenlok maliba ajanga August ita nungi iba tashidak menar ano tali akumer. Linük yimtiba, Moscow ya Russia nung iba tashidak menatepa aoba tesep ka amai lir, kong taoba hopta tashidak tali poktetshi aser

mozüki bushir timba akumer, ta ketdangsürtemi ashi.

Brehostibarnü Moscow nung COVID-19 cases 3,445 liasü, kong Bodhbarnü cases 1,991 liasü. Tsüngkum melenshiba mapang tango sashiba nung timtem agütsüba tashidak aser summer vacation sülen nisung ajurutepba ajanga cases timba akumer, ta Deputy mayor Anastasia Rakova-i Bodhbarnü ashi.

Tang Moscow nung COVID-19 cases ya ajak Delta variant lir, ta lai ashi. Iba tashidak wara poktetba sülen Russia nung nisung million tenet dak tema iba tashidak agi menep aser nisung 201,445 asü, koba Europe nung asür timtiba alitsü.

Ketdangsürtemi iba tashidak süoki ia magizük, ta aitsür aser 2020 nung mezüngbuba lockdown benokba sülenbo

tenokdangba tasen magütsü.

Iba tashidak agi menep aser asürtem timba kumaka lockdown tanaben benoktsü sentong kecha mali, ta Kremlin odongtar Dmitry Peskov-i osangbener dang Brehostibarnü ashi. Russia nung coronavirus tashidak den sendaktepa asüba ya 350,000 dak tema lir, ta statistics agency Rosstat-i August ita tatemlen shia liasü.

Ita aika Russia nung vaccine amshia arur, saka ketdangsürtemi nüburtem nem iba mozü agütsütsü merangba balaka mali. Nütsüng yongsük shilem 28 dang mozü ya agiogo, ta sorkar data ajanga Brehostibarnü ashi.

Taoba hopta Tir Vladimir Putin-i par telok nung COVID-19 cases ter dak tema putetba sülen pa self-isolation nung lir, ta shia liasü.

## OFFICE OF THE LONGJANG JAMIR KIDONG TELONGJEM DIMAPUR UNIT KONANG TETUSHI AGÜTSÜR

Wb. **S. Asang Jamir** S/o M. Sariangnen 2021 Teacher Award ngua kidong aser sensosanger nem konang nüngsang tulu bener arutsüba asoshi pelar aser konang tetoshi agütsür.



Tarutsü nunga Tsüngremi nü wadang aser nür kibong ano maneni temaba nung amshia moajangma ta asen Jamir kidong züngsem ajaki sarasademtsür.

**P. Supong Jamir**  
(President)

**Imtapong Jamir**  
(General Secretary)

## Happy Birthday

TENÜNG : TIAJUNGTI JAMIR (AKHOYA)

TASOBA ANOGO : 25 SEPTEMBER 2016

KÜM : 5

CLASS : LKG

SCHOOL : JUBILEE MEMORIAL SCHOOL, MKG

TALIDAK: MONGSENBAI WARD, MOKOKCHUNG

Tsüngrem toachi agi Jala küm pungo (5 years)

tashi abensaba tepela salem lemsateper. Maneni asen Teyanglur Tsüngremi anema aliba taküm den arishi talang moajangma ta sarasademtsür



-Temeim Oja, oba, baby Muluienla, otsü, obu,Azu,Aou aser kinungertem

# Rara tembangtsü North Korea-i molunga lir: Kim Yo-jong

**Pyongyang, Rongjui/Sept. 24 (Agencies):** South Korea-i tsükchi adentsü yimyatem amshiba anenra maneni jembishinütsü molunga lir, ta North Korea lenir Kim Jong-un tenui ashi.

Korean War tembangtsü atema yimjak nung sangdongtsü asoshi South Korea-i asendenshir ajungshiba langzüdüng Kim Yo-jong-i iba o ya ashi.

Linük ana sadangba rara ya 1953 küm peace treaty masü armistice ajanga tembanga lir.

Iba sülen linük ana ya 'technical' tsütsü nungbo rara nung lir, aser mapang kaka tesendaktep kanga mejungi lia arur.

Tan hopta South Korea Tir Moon Jae-in-i Korea linük ana aser par tembar linüktem - US-i South busemer aser North indang rongsenketzüng tsütsü China ya tembar tajungtiba lir - dang iba rara tembangtsü sangdonga peninsula nung yimjung bener arutsü ajungshia liasü.

Iba sentong ya North Korea nungner minister kati magizük.

Saka meimlai lia state media ajanga Hokulbarnü sangdong ka nung iba sentong ya tajung lir, ta Kim-i ashi.

Ajisüaka South-i par asoshi tim masüba mapa inyakba anenba sülen ang North-i jembishinütsü molunga lir, ta lai ashi.

"Yimya ana amshiba, tai angatettsüsa mapa tamajung inyakba, yimya tamajung aser onok self-defence temeden amshiba nung aibelenja tim masüba mapa inyakba ya anentsü nüngdaker," ta lai sangdong ka nung ashi.



**Kim Yo-jong (Fle photo)**

"Itemji inyakba sülen ang tejak-o tejak jitepa amentsü aser rara anenba sangdongtsü."

Ita tetenzüklen North Korea-i par nok-o-nü tendanger ghonda ishika lir South Korea-ia par meyong submarine-launched ballistic missile mezüngbuba tendanga liasü.

South Korea-i küm shia US den lungjemer military drills agiba atema North Korea-i mapang shia aija arur.

2019 küm Kim Jong-un aser US tir Donald Trump na tsüngta denuclearisation ken o jembishinüba anendakba sülen linük ana tsüngta tesendaktep nung terenlokba mali.

Rara tembangtsü sangdongba ajanga North Korea dang denuclearise asütsü ajungshitsü, ta Moon-i taoba mapanga shia liasü.

Külen North Korea-i iba melen par rongsenketzüng tsütsü tenokdangba agüja aliba mezüng agienjang, ta akhanger.

Saka tenokdangba magiendang North Korea-i par nuclear weapons ya yutsütsüla, ta US-i nenshia ashir.

# Miss Phek Foundation lapoktsüogo



Phek, Rongjui/September 24, 2021: Phek nung 'Miss Phek Foundation' lapoktsüba mapang, DC Razouvolie Dozo aser tangartem külemi tangokba noksa ka yangi angur.

**Kohima, Rongjui/ September 24, 2021 (TYO):** Brehostibarnü (23.09.2021) Phek Town nung Miss Phek indang semi finalists metetdaksüba mapang, Miss Phek Foundation lapokja liasü. Iba foundation ya charity project ka asütsü, ta sangdong ajanga metetdaksü.

Deputy Commissioner Phek, Razouvolie Dozo-i Miss Phek Foundation lapokja liasü, ta Vogue Entertainment Nagaland-i metetdaksü.

Phek District nung maongka tajung mangur tetsürtem nem nungdakba teyari agütsüsü aser shisaliok bushiba tsüsü nungittsü nükjidong nung Miss Phek Foundation tenzüksür asütsü.

Vogue Entertainment Nagaland, managing director Dode Nakro-i, nübür aikati

beauty pageant industry ya tim masüba sentong ka ama bilemer; ibayongji nübür molung nung tangatetba tajung lidaktsüsü aser o kisüing agi masü, saka mapa agi inyaka sayutsü asoshi iba tentet ajanga tajungtiba inyaktsü meranger aser iba atema Miss Phek Foundation ya ajak asoshi tatishitsü ka asütsü, ta ashi.

Pai ashiba agi, beauty pageant ya pei tepor ajungba kisüing dang masü, saka tangara temoatsü angutsüsa pei jakla aser sempet tajung amshia taküm litetbaji lir.

Iba project ajanga, pageant industry ya lenla ajunga nung terenlok aliba maparen, mapa maongka aser nübür asoshi ambassador ka ama inyaktetsü asoshi onoki nübürtem dang sayuner, ta Nakro-i ashi.

Miss Phek sentong nungi

ajanzükba ajak Miss Phek Foundation nung agütsüsü aser iba sabang ajanga kar taküm nungbo temelenshi tajung adokdaksüsü akok, koba taküm indang sentong omen "Women towards wellness" ajanga jembir, ta pai ashi.

Phek DC-i, "Iba sentong takok angutsü asoshi ajaki temeim sayua aser kati ka asoshi aria bilemja inyaktsüla aser alima dang pageant ajanga telongjem sayutsüla," ta ashi.

Session balala ajanga shilem agirtem inyakyim tenzüksü asünung, nübür dang pei sempet tajungtiba sayutsü asoshi ajemalua shisatsü alitsüla asoshi pai semi finalists pageant tem ajungshia liasü.

DC-isa, telongjem asoshi ambassador ka ka akümtsü asoshi parnok ajungshio.

# AH & VS Department ajanga metetdaksür

**Dimapur, Rongjui/ September 24, 2021 (TYO):** Meluri Sub-division, Phek District kübok tawa Kangjan yimtsüing nung mejangjaba tashidak agi jang tem (buffalo) asüba dak sendakba nung, iba tashidak bushisüingdangtsü/ jangjatetsü atema Department of Animal Husbandry and Veterinary Services-i ELISA laboratory, Kohima nung

Laboratory test agiogo, ta sangdong ajanga metetdaksü.

Department ajanga laboratory test agiba mapang, iba tashidak ya Gram negative, Coccobacilli, Bipolar mesen - 'Pasteurellamultocida' ajanga adokdaksüba tashidak ka liasü ta jangjatetogo. Kangjan yimtsüing nung jang asüba tashidak ya Haemorrhagic Septicaemia (HS) ta jangaajo.

Anungji, kiset shiruru metsürtem dang kümdanga alitsü aser iba ama lendong atalokdang District Office nung osang agütsüsü asoshi mepishio.

Iba den bendenloksema, iba tashidak prokba aziüktsü asoshi asalentong yanglutsü atema Directorate office aser ELISA Laboratory den longjemer inyaktsü CVO's dang mepishir, ta kasa sangdong nung shia lir.



Dimapur, Rongjui/September 24, 2021: India nüjiso ngur küm 75 ajungba nungtem nung, Hokolbarnü (24.09.2021) Sakus Mission College indang Red Ribbon Club den longjemer National AIDS Control Organisation, Ministry of HFW, Gol kübok Nagaland State AIDS Control Society ajanga HIV, TB aser Blood donation nung awareness sentong ka agia liasü. Iba sentong tenzüka SMC indang Chaplain, Amenla Aier-i sarasadem. Mecievinuo Zhotso, District Programme Officer, Kekuoseno Peseyie Senior Tb Lab Supervisor (District Tb Centre) aser Orenthung, Supervisor (ICTC) nungeri HIV tashidak alirtem telok nung sendokba aser parnokji balaka ama bilemja, TB tashidak temaitsü aser iba tashidak atema taneptsü lenmangtem; aser azü tenlaba indang tongtibang onük nung lemsatepogo.

# KANGTSÜNG LAISHIR TELONGJEM

*moatsür*



Mr. Jongpong Imsong, East Dimapur Ao Baptist Arogo nung sannüker wadang nung küm 13 inyaka lia September 19, 2021 anogo nung Ao Baptist Arogo Mungdang (ABAM) ajanga East Dimapur Ao Baptist Arogo (EDABA) nung Kibubar wadang tali jungkai adokdaksüsü asoshi Tsüingrem taochi aser lenisüba nung takok ngua ordain sütsüba asoshi ozü Kangtsüing Laishir-i ABAM aser EDABA dang kanga pelaba lemsateper.

Tsüingremi Rev. Jongpong Imsong aser par kibong Tsüingremer mapa nung takok aser temoatsü nung aniang ta pelaba den Kangtsüing Laishir Telongjem ajanga sarasademtsür.

~ Kangtsüing Laishir Telongjem.

# KOTAKER MONGCHEN NUNG KÜM KA RENTETOGO



Mrs. P. AYANGLA

25th Sep 2020 - 25th Sep 2021

Sür küm ka ajungba anogo nung na bilemteta amunger. Nai onok toktür oaka na akümlü nung alidang onok meimba aser mapa tajungtem onoki amatsü makoker.

~ Temeim Chirnur, Semchir aser Kinungertem.

# PELABA LEMSATEPER

Temeim aketba tebu ka pilaogo, mapa meranga inyaker ka anisüingzüker; nai lenla aika ajanga onok taküm nung kongshio.



24.8.1939

12.09.2021

TEMJENMONGBA JAMIR

"Saka ni alanzüksang taküm lir ta ni junga metet; aser kenü anogo alima nung pai noktaksü. Aser kü mang shizüka orr külen, shi nung mesüia ni Tsüingrem ngüküm. - Yob 19:25-26

Ozü asükhu mapang medemerterem, kija-kibong, Arogo aser lokti tentet balalai sarasadem nung onok nungitta, aria bilemja aser temeim sayua lenmang balala agi yariogo, nenok ajak dang iba sabang ajanga pelaba lemsateper.

Onoki teti meima aliba Awoa/Abao, pa mapang talangka shiranga alidang aser pa tasünü tashi kwinaakati ozü dang temeim sayuogo, nenok ajak dang kanga pelar.

Nenoki temeim mapa sayuba onok molung nung teti alitsü. Tajungsang Tsüingremi nenok taküm maneni moajangma.

~ Temeim Jala, Jabasotem, Semchirtem, Tanabuba Semchirtem aser Anük-Apangtem.

# METETDAKTSÜR

MRS. POKYIMLILA LONGCHAR (Süingratsü), la nem shir-i senotsü aputsür, ibaji la kinungeri memetet aser khuret mabentsü.

~ Tesangdonger Kinungertem

## Durand Cup: FC Goa semi final-i iogo



Kolkata, Rongjui/September 24, 2021: Durand Cup football asayamung - quarter final nung FC Goa-i Delhi FC madak goal 5-1 agi takok anguba sülen FC Goa asayartem (jersey temerem) pelatepba yangi noksa nung angur.

**Kolkata, Rongjui/September 24, 2021 (Agencies):** Hokolbarnü, Kalyani stadium nung, 130buba Durand Cup quarter final asaya nung, FC Goa puri goal 5-1 agi Delhi FC tsükdaktsüba sülen, par telok semifinal-i iogo. Iba asayamung tenzük nungi quarter tashi FC Goa-i shilem tajung agia asaya aruogo.

FC Goa aser Delhi FC na tsüingda iba asaya nung, Devendra Murgaokar, Muhammed Nemil aser Brandon Fernandez nungeri Goa atema goal ka ka idaktsü. Mezüing half nung par asempronlai goal ka ka idakja liasü. Break sülen, tanabuba half nung, Leander D'Cunha aser Romario Jesuraj nati Goa atema goal pezübuba aser pungobuba idaktsü.

Delhi FC atema, Nikhil Mali-i goal ka idaktsü. Taruba Bodhbarnü (29.09.2021) Vivekananda Yuba Bharati Kirirangan (VYBK), Kolkata kübok tanabuba semifinal nung Gaurs (FC Goa)

asayatsü. Honibarnü (25.09.2021) VYBK kübok ISL nung külem shilem agir Bengaluru FC aser Army Green na tsüingda quarter final tatembuba asayatsü aser iba asaya nung takok angur team-i FC Goa den Semifinal asayatsü.

Hokolbarnü, Delhi FC puri mezüing quarter tashi junga asaya liasü aser parnoki goal idaktsütsü maongka angu. Delhi nungi Anwar Ali aser Willis Deon Plaza nati goal idaktsütsü maongka angu, saka asayar kati dang goal meinoktsütet.

Minute 15buba nung FC Goa puri maongka tajung ngua, Devendra Murgaokar-i mezüing goal idaktsü aser parnok goal 1-0 agi Delhi tejakdang kümadok. Iba asayamung nung Devendra-i goal pezü tashi idaktsür asütsü. Minute asem sülen, Gaurs atema Muhammed Nemil-i goal tanabuba idaktsü.

Tanüingba mezüing half tashi, Delhi FC puri goal inoktsütsü maongka kar angu, saka de-

fence tsütsü Goa pur tashiita noktakba yong, item goal nokdangtet.

Mezüing half temer mapang talila apuloktsür asaya liasü, kong Brandon Fernandesthen-i Delhi keeper Lovepreet adena goal ka metsüloktsü aser Goa FC goal 3-0 agi Delhi tejakdang ser iba shilem tembangadok.

Break sülen, tanabuba half nung, Delhi FC pur asentenshir asaya liasü aser parnoki asaya amokbangtsü ama asadantet, saka parnoki goal inoktsütsü mapang talangka agi. Asaya tatemlen, minute 82buba nung Nikhil Mali-i Delhi atema goal ka idaktsü.

Maneni, Goa atema Leander D' Cunha-i goal ka idaktsü aser Alexander Romario Jesuraj-i telok atema goal pungobuba inoktsüba sülen, FC Goa-i goal 5-1 agi iba asaya koktet.

Iba quarter-final nung Leander D' Cunha-i alakteta junga asayaba atema, pa nem Man of the Match award agütsü.

## Bhubaneswar nung '2021 Junior Men's Hockey World Cup' ayongzüksü

**Bhubaneswar, Rongjui/September 24, 2021 (Agencies):** Aruya aliba '2021 Junior Men's Hockey World Cup' ya Bhubaneswar, Odisha nung ayonga asayatsü, ta sangdongogo.

Iba asayamung November 24, 2021 nungi tenzüka December 5, 2021 tashi asayatsü aser Odisha Chief Minister Naveen Patnaik-i ashiba agi, ajungbena süaka iba asayamung ayongzüksü asoshi 'hosting rights' agütsüogo aser linük asoshi iba ya maongka ama aser kanga tongtibang ta asadanteta, asayamung achaayangertemi Junior Men's Hockey World Cup ayongzüksü asoshi bangjemtep.

"Iba ama asayamung tuluka ayongzüksü atema, mapang tatsüka tsüingda maparen achaayangtsü ya tebilemtsü aser tang ama pandemic mapang item asaya tamakok maludaktsütsü asoshi junga bilemdangtsü nüngdaker. Linük

asoshi iba asayamung tongtibang asünung, onoki sentong achaayangtsü asoshi molungogo," ta Patnaik-i ashi.

Tang ama Covid-19 tensa den mapang tatsüka tsüingda ajungbena Odisha nung iba asayamung ayongzüksü khuret lemezüksüba ya mezüing masü. 2017 küm-a Bhubaneswar nung 22buba Asian Athletics Championships ayongzüksü liasü. Mezüingbo, Ranchi nung Asian Athletics Championships ayongzüksü renem, saka ajungbena dang iba yimti nung asayamung magitsü lemtetba sülen, anogo 90 tsüingda Bhubaneswar nung iba asayamung ayongzüksü asoshi lemezüksü.

August ita tembangba Tokyo Olympics nung India tebur aser tetsür hockey team anapronglai takok ngua shilem agiba sülen, team anaprongla nungitta yariba asoshi Odisha aser Patnaik dang pelaba metetdaktsü.

Iba asayamung (Tokyo

Olympics) nung, otsüsütsüsa India tetsür team-i jenjang pezübuba ajangzükttet. Tetsür team-i iba Games nung quarter final tashi tongteta asaya, koba India tetsür hockey team Olympic putiotsü nung mezüing asütsü aser parnoki Australia team tsükdakja quarter final tongtet.

Ano külen, India tebur hockey team-ia otsüsütsüsa bronze medal takok angu. 1980 Olympics nung shilem agir külen nungi India tebur Hockey team-i linük atema mezüing medal koka liasü.

Maneni, '2021 Junior Men's Hockey World Cup' nung Australia aser New Zealand team anapronglai shilem magitsü osang sangdongogo. Team ana dak alaka, iba asayamung nung team 16 - India, Pakistan, Korea, Malaysia, South Africa, Egypt, Belgium, England, France, Germany, the Netherlands, Spain, USA, Canada, Chile aser Argentina nungeri shilem agütsü terenemba lir

## KKR captain Eoin Morgan dang senchi achi

**New Delhi, Rongjui/September 24, 2021 (Agencies):** Brehostibarnü, Zayed Cricket Stadium, Abu Dhabi nung Kolkata Knight Riders aser Mumbai Indians na tsüingda Indian Premier League (IPL) asayaba mapang, 'slow over-rate' atema KKR captain Eoin Morgan dang senchi lakh 24 achi.

"IPL indang Code of Conduct kübok 'minimum over-rate' dak sendakba nung team-i (KKR) tanaben aibelenba asadanteta, Kolkata Knight Riders captain Eoin Morgan dang senchi lakh 24 achi," ta IPL sangdong ka ajanga metetdaktsü.

"Tanüingba züingsem (Kolkata Knight Riders nung asayar 11) dang pei pei indang match fee nungi lakh 6 mesüra shilem 25% shi senchi chiogo," ta kasa sangdong nung shia lir.

Indian Premier League nung Kolkata Knight Riders puri defending champion Mumbai Indians madak takok angutsü asoshi, KKR nungi Rahul Tripathi aser Venkatesh Iyer nati half-century yanglua liasü. KKR puri Mumbai Indians madak wicket 7 agi takok angu.

Run 156 tongtettsü asoshi,

iba asaya tanabuba innings nung KKR-i junga asaya tenzük, kong Tripathi-i ball 42 nung run 74 (not out) aser Iyer-i ball 30 nung run 53 yanglua liasü. Tena sentepa run 88 shi bendenloktsü aser over 15.1 nung KKR puri ayong ayonga dang iba asaya koktet.

Mumbai Indians nungi Jasprit Bumrah-i wicket asem out sütsü aser item wicket dak alaka, over pezü nung pai run 43 agütsü.

Iba asaya mezüing innings nung, Mumbai Indians puri over 20 nung run 155 yanglua liasü aser parnok batsman 6 tashi out süadok.

Mumbai Indians atema, Quinton de Kock-i half century yanglu, kong ball 42 nungi pai run 55 yanglua liasü. Iba den külemi Quinton aser captain Rohit Sharma (run 33) na sentepa run 78 yanglutet.

Mezüing innings tatemlen, Lockie Ferguson indang bowling nung Kieron Pollard (21) aser Krunal Pandya (12) na out mesütsüdang, tenati Mumbai Indians atema run 30 bendenloktsü. Kolkata Knight Riders nungi Ferguson-i wicket ana agi (2/27) aser külem asayar Prasad Krishna-ia wicket 2 (2/43) out sütsü.

## IPL 2021: SH nung Umran Malik anisemogo



Umran Malik

**Dubai, Rongjui/September 24, 2021 (Agencies):** Indian Premier League (IPL) 2021 indang tanabuba shilem atema, Sunrisers Hyderabad (SRH)-i T Natarajan melena medium-pacer Umran Malik anisemogo. Natarajan, shiba dak Covid-19 putet, pa iba wara nungi taneptsü

mangu tashi mapang tatsüka atema SH nung pa melen Malik asayatsü.

Bodhbarnü (24.09.2021) SunRisers Hyderabad aser Delhi Capitals na asayatsü ghonda ishika lia, asayar ajak Covid-19 tendangba mapang Natarajan dak Covid-19 positive putet.

Jammu Kashmir atema Malik-i T20 ka aser List A match asayaogo; aser pai wicket pezü tashi out süja lir. Net bowler ka ama, pa Sunrisers Hyderabad nung shilem agia liasü.

"Regulation 6.1 (c) kübok, original squad nungi züingsemtem tanaben team indang bio-secure environment telungi aittsü temelaba magütsü tashi, mapang tatsüka atema asayar tanga anioka asayadaktsütsü melar. Anungji, Natarajan taneptsü mangu (Covid-19 negative) tashi aser team nung tanaben adentsü memela tashi Sunrisers Hyderabad atema Malik asayatsü," ta IPL sangdong nung shia lir.

## BILEMDANGANG

"Leniri aibelenra tanidaker timatemer."